

Buskeda di Natalee a bira intenso


Enfoque awor riba saliña pabao di Aruba Racquet Club



Dos bombero ta hibando e machine mey-mey di e Saliña.



Prensa Mericano aki ta enfoca hasta ora cu Bomberonan ta pasa e slang bao di Duiker di Boulevard.



Un biaha mas, Bomberonan cu nan Dompel-Pomp panort di e area di Marriott Aruba Resort.



Bomberonan para aki dilanti e Saliña grandi cu nan tin di bay pomp y haci bashi.

ORANJESTAD (AAN): Manera ya ta conoci tur caminda, DIARIO a logra di haya un testigo hopi importante, kende a muestra hopi detaye clave pa e investigacion rond di e desaparicion di e estudiante di Alabama, esta Natalee Holloway.

Desde Dialuna 30 di Mei, e mucha muher aki ta perdi. Despues cu a encarcela dos Securityguard inocente, finalmente a detene e tres personanan cu a mira Natalee pa ultimo biaha, esta e rumannan Satish y Deepak Kalpoe, y Joran van der Sloot. Tata di Joran tambe a worde encarcela pa algun dia. Finalmente awor ta Joran so ta tras di trali.

Algun siman pasa, ya caba Texas EquuSearch a haci un investigacion den e area banda di Aruba Racquet Club, y nan "cacho" special a actua masha raro mes. Pero no tabatin forma pa check

mas profundo den tera.

Awor e testigo cu Diabierna a worde treci pa e team investigador di DIARIO, ta pone cu mas enfoque ta cay den e area aki. DIARIO ta bolbe ripiti, cu Joran van der Sloot ta un miembro di Aruba Racquet Club, y e conoce e area ey hopi bon. Despues di Tennis, na pia mes ta pasa via di e saliña y yega na e beach di Fisherman's Huts. Na pia mes e ta cana bay back.

Pues e area aki, ta uno cu Joran conoce bon-bon.

For di Dialuna caba por a mira movimiento, e.o. autoridad a bay cu e testigo nobo aki den Helicopter pa e duna indicacion unda el a mira e tres sospechosonan principal den e caso, sinta den un auto cerca di Aruba Racquet Club.

TIN "ALGO" SERIO CU E AREA

Aunke den pasado ya caba a

busca den e Saliña cu tin pabao di Aruba Racquet Club, tog awor cu e testigo a sali, a start na enfoca den e vecindario. Posibilidad ta grandi cu mensahe a bay pa Hulanda tambe, pa asina esnan cu ta check e potretnan di e avion F-16, pa double-check e area aki.

Sinembargo e siman aki, un situacion nobo a presenta. Tempo cu Texas EquuSearch a busca, e saliña tabata seco. Pero como cu awacero a cay hopi door di Horcan Emily, e mesun saliña aki a yena na algun lugar hasta cu 1 meter di awa.

Debi na esaki, Ministerio Publico a pidi pa unidad di Bombero presenta cu e Dompel Pomp. Aki a start na pomp awa di e saliña, y mande pa laman. Esaki no a stroba ningun pasada di auto y trafico riba caminda di Boulevard, como cu bao di e

caminda tin un duiker, unda a pusha e hose cu ta manda awa na 3.000 gallon pa minuut.

Den careda di 9'or di anochi, e trabao di pomp awa a start. Bomberonan mes a cana drenta den e Saliña pa pone e Collector, cu ta e inlet.

Oficial Gomez di Cuerpo di Bombero a splica DIARIO, cu nan mes no sa kico ta buscando. Nan a djis haya orden pa pomp e awa. Tin miedo cu e pomp por 'chupa' cos robez? Esey ta imposible, como cu tin un filter net dilanti e inlet, y cualkier cos raro mesora nan lo stop e pomp.

Mirando cuanto awa a cay, y con yen e saliña ta, nan ta calcula cu lo bay dura mas cu un of mas dia prome cu nan keda cla cu pomp e awa aki.

Varios observador a muestra cu tin algo "serio" cu e area aki. Especialmente e hecho cu

por lo menos Joran conoce esaki asina bon, cu e por hasta cana wowo tapa for di Beach pa Racquet Club. E conoce pues tambe delaster un 'punto' eynan.

Manera por lesa riba pagina 2, den su declaracion mey-mey di luna di Juni, Joran a revela cu Deepak a viola Natalee y despues a mate. Si acaso ta asina, e ora por conclui cu e area aki lo ta ideal pa nan deshaci di e curpa, como cu e ta asina cerca di Fisherman's Huts, y Joran conoce "e lugar".

Algo cu ta pone mas credibilidad awor den e storia di Joran aki encuanto Deepak, ta e hecho cu e testigo nobo aki ta revela cu el a mira e tres sospechosonan aki cerca di Aruba Racquet Club e madrugada ey. Algo cu ningun di tres aparentemente na un forma misterioso, a "lubida" di revela anteriormente?